

S. Quod ad frequentes et eas quidem gratissimas epistolas, charissime frater, nihil responderim, non negligentię, sed absentię potius ascribas. Invisimus capitulatim universi agri ministros, atque id per tres septimanas, et ecclesiarum, ministrorum, simul et praefectorum tum negligentiam, tum vigilantiam ita percontati sumus, ut nihil certius nunc senatui nostro offerre possimus quam sui agri statum. Convocantur 10. novembris omnes praefecti in urbem nostram. Commendabitur illis, quatenus maiori studio dei gloriam promoveant, vitiis obstent, quam hactenus factum sit. Utinam senatus uterque pro voto et ex animo omnia agat. Dedimus illi in manus, quid, cum quibus et quo ordine omnia agere debeant. Invenimus etiam profectum capitulorum, dum ita a nobis visitantur. Observamus doctrinę, morum et vitę, familię, ecclesiarum et praefectorum censuram, instamus monendo et minando quam constantissime, et sentimus, quantum obfuerit hactenus oscitantia nostra. Monuimus fratres omnes, quatenus omnibus viribus, sed solida veritate et modestia, se papismo opponant totamque illam religionem ita depingant, ut nemo non sit, qui imposturam illam intelligat. Monuimus, ut omnium rerum et hominum turbam, temporum pericula, iram domini imminentem perpendant instare securim ad arboris radicem. Haec me impedierunt, ut hactenus nihil responderim. Remitto, quae petis. Displicet nebulonis illius redempta captivitas, et utinam non reddatur illa benignitate deterior, quemadmodum apud nos omnes fieri soleat. Paulum Rasdorffer vellem ex animo apud nos habere locum, sed nulla dum se obtulit occasio. Quam primum hominem iuvare poterimus, nemo apud nos illi deerit. Ipse scis, quam plebs abominetur linguam alienam. Nulla apud nos sunt nova. Expectamus a comitiis. Interim si quid apud vos acciderit, scribe. Vale et deum pro nobis ora.

9. novembris anno 32

Tuum minimum nummisma.

Heinrico Bullingero,

Tigurinę ecclesię ministro

vigilantissimo, fratri suo

omnium et semper charissimo.